

Interes pa Songfestival ta sumamente grandi

ORANJESTAD, 29 okt. - Segun e organisadornan e interes pa e venidero songfestival otro luna na Aruba ta ya caba sumamente grandi. Un gran cantidad di cantantenan ya a laga inscribi nan mes pa participa den e songfestival cu lo tuma lugar for di dia diezcinco di novem'ber venidero te cu dia diezcinco di december siguiente den Klompen Klub di Aruba Caribbean Hotel. Segun plannan cu ta existi, e organisadornan ta desea di lo por a habri e festival cu un defile di e artistanan acompaña pa steelband door di e callanan di Oranjestad.

Segun e organisadornan, kende-

nan no ta laga di haci e songfestival aki tan grandi cu ta posibel pa nan, ya e siguiente cantantenan ta algun di esnan cu a inscribi. Esta Nilka Franka kende lo wordu acompaña pa Los Latinos, Myriam Arends, Glenda Diaz, Ronny Britten, Joel Romney, - Theolindo Lopez, Jossy Brokke kende lo worde acompaña pa Los Llaneros, Alida Westerburcher cu acompañamento di Maria-chi Aruba, Alfred Boye kende lo presenta cu Los Criollos, Oscar Figueroa cu The Magnificent Five, Glenn Alten Pietersen, Anna Lilian Kock, Donald Mackay cu Hap Cats, Eddy Toppenberg

cu Trio Huasteca, Anthony Ray Thomas y Jose Felix Velasco di Beatniks.

Segun e organisadornan ta spera por lo menos trinta cantante lo participa. Como "guest stars" lo ta presente na e festival Rufo Odor, Flor Arends y tapdancer Tony Hassell. E hurado cu lo cualifica e cantantenan lo consisti di nueve persona local y seis extranhero (turista). Presidente di e jurado a keda nombra senjor Emelindo Eleonor. E cantantenan lo worde cualifica ariba cuatro punto: calidad y stem y harmonia exacto; articulacion y expresion; melodia y tambe bistir y aparecion. Pa cada parti cada miembro di hurado no por duna mas cu binti cinco punto. E organisadornan ta sumamente contento cu e cooperacion cu nan a ricibi di algun persona y comerciantenan y e directiva di Aruba Caribbean Hotel.

Nan ta spera cu e cooperacion lo bira mas grandi y cu e exito lo ta di tal forma cu e organisadornan por risca haci e evento aki algo tradicional. Un songfestival di artistanan Antillano pa publico local, pero especialmente esun extranhero, cual te na e momento aki masha poco ta mira kiko Aruba por brinda nan di su mes suela. Lastimamente segun e organisadornan cu varios instancia y persona no ta mira e punto aki ainda. Segun nan ta spera e exito lo muestra esaki mas claro.